




Sevgein ha puspè ina maisa radunda

Hedy e Hans Schilling da Siebnen s'engaschan per l'ustaria dal vitg da Sevgein.

4



Il pled da l'onn 2014: «Far linlogn»

Il Radio Rumantsch ha tschamni il pled da l'onn 2014 or da 100 propostas inoltradas dals auditurs.

11

DIE SÜDOSTSCHWEIZ

LA QUOTIDIANA

Redacziun: Via comerciala 22, 7007 Cuira, tel. 081 920 07 10, mail: redaktion-lq@suedostschweiz.ch

Treis objects da valeta

■ (anr/gv) L'organisaziun Protecziun dalla patria numna en sia nova ediziun 91 hotels digns da mantener. Da quels sesanflan treis hotels en Surselva e sco sulet baghegius da niev l'Ustria Steila a Siat. Ils ulteriurs menaschis ein l'Ustria am Brunnen a Valendau ed il «Nühus» sur Stussavgia Plaz. Ils dus emprems numnai ein projects digl

architect indigen Gion A. Caminada da Vrïn. En tut ils treis menaschis numnai egl inventari dalla Protecziun dalla patria statan ils products indigens el center. A Valendau datti ils products indigens ord ina cuschina da gourmet premiada cun 13 puncts da Gault Millau.

> PAGINA 4

In cosmopolit ei candidat

Beat Roeschlin duei daventar president communal da Tujetsch

DA GIUSEP VENZIN / ANR

■ Ils Tuatschins manegian buca bein cun lur presidents communs ed anflan consequentamein negin indigen pli che vul surprender il tgamun dalla vischnaunca sisum la Surselva. Ussa han els anflau in cosmopolit dil cantun Zug ch'ei promts da surprender igl uffeci. Alla radunonza communal dil venderdis sera ha il vicepresident André Schmid presentau Beat Roeschlin sco sulet candidat per las elecziuns d'entschatta mars 2015. Il candidat ei buca staus presents. Sco il vicepresident ha informau ei quei stau sapientiv. Il candidat vegni presentaus el decuors dil schaner cun caschun d'ina occurrenza d'informaziun. Cun quella caschun datti aunc la pusseivladad da nominar ulteriurs candidats. La suprastanza senza president havess bugen dau als vischins la pusseivladad d'ina elecziun cun plirs candidats. Dus ulteriurs hosps da vacanzas ch'eran s'annunziats han retratg lur candidatura. Beat Roeschlin dumbra 59 onns ed ei el ver senn dil plaid in cosmopolit.



La vischnaunca da Tujetsch ei dapi la primavera alla tscherca d'in candidat pil presidi communal. Per l'elecziun dil proxim mars stat Beat Roeschlin da Walchwil el cantun Zug a disposiziun.

Naschius eis el a Paris ed ei burgheis da Stäfa el cantun Turgovia e da Buchberg el cantun Schaffusa. Sias competenzas

professionalas ha il candidat pigl uffeci da president communal dalla vischnaunca da Tujetsch contonschiu sco persuna

da cader en intepresas naziunales ed internaziunales.

> PAGINA 3

La puorla da latg maunca

In «muchas gracias» dallas Andas peruanas

■ (anr/gv) El decuors da quest onn han Barbara Casanova da Sursaisa e Clotilda Demund da Trun gudiu entgin sustegn dalla Surselva. La tscheina en favur dalla casa d'affons Urpi Wasi organisada da Amanda Deplazes da Surrein vegnan biars segirs aunc ad haver en buna regardientscha. Cun ina acziun el rom dalla matura ha Amanda Deplazes realisau in project admirabel. Admirablas ein era las duas dunnas sursilvanas che s'engaschan a Peru en favur dils affons en pupira. Ellas

tarmettan dallas Andas peruanas in «muchas gracias». Igl agid ei beinvegnius e mintga da tschun va el dretg liug. Dapi uonn dat la Svizra buca pli la puorla da latg ed ils affons egl Urpi Wasi survegnan treis ga ad jamna ina buglia d'aveina mischedada cun «kiwicha». Clotilda Demund ha anflau ina ovra successura per la casa da giuvenils ad Arequipa e sa concentrar sin in territori meins spatishau egl intern dalla tiara.

> PAGINA 3



370 affons ed ina dunna cun in surrir en fatscha. Quei ei igl Urpi Wasi e Barbara Casanova a Cusco in Peru.

FOTO G. VENZIN

Privel d'accidaint pervi da cameras da GoPro

■ (anr/afi) Il trend da chaplins cun cameras pitschnas per far videos o fotografias d'aventuras vain adüna plü grond. Pro'l sport d'inviern vegnan montadas quistas cameras vi da la chaplina dal skiunz o dal snowboarder. Per far purtrets spectaculars ris-chan ils singuls biler. Els bandunan las pistas, fan manövers curaschus ed invlidan lur sveltezza. Da la vart tecnica po üna chaplina perder l'effec da protecziun schi vain fat landervia manipulaziuns. Il Post da consultaziun svizzer per la prevenziun d'accidaints cussaglia da desister da quistas cameras.

> PAGINA 7

Giapunais mancan

■ (rtr) Pervi da la crisa economica en il Giapun vegnan pli paucs turists en Svizra. La cifra da pernottaziuns è ida enavos da schaner fin october per passa 10% en congual cun l'onn passà. A Zermatt èn las pernottaziuns sa sbassadas perfin per 20%. Sunter la China è il Giapun per il turissem svizzer il pli impurtant martgà asiatic.

Danovamain in giubileum

100 onns viafier da Cuira ad Arosa

■ (anr/gns) Ils davos onns ha la Viafier retica adina puspè gi in giubileum. Plaunet van ussa quels lura a fin suenter las festivtads da la davosa fin d'emna. A Cuira ed Arosa ha la populaziun

festivà il giubilum da 100 onns dapi che l'emprim tren è cursà tranter quels dus lieus. Vegnida festivada è er l'avertura da la nova staziun d'Arosa e per sanar quella ha la Viafier retica investà 24,4

milliuns francs. L'object da parada da la staziun d'Arosa èn la nova passarella e la colliaziun directa tar la pendiculara «Weisshorn».

> PAGINA 2



Dapi 100 onns curescha la Viafier retica tranter Cuira ed Arosa.

FOTO SWISS-IMAGE

Davomezdi d'infuormaziun da la TESSVM

■ (anr/bcs) D'incuort ha gnü lö aint il local da cultura i'l Bogn Engiadina a Scuol üna davomezdi d'infuormaziun. Hoteliers e rapreschantants da la parahotelaria sun gnüts a savair da Jeannine Züst da la destinaziun turistica Engiadina Bassa-Samignun-Val Müstair che chi gira e passa. L'istessa infuormaziun ha fingià gnü lö in tschellas duos subregiuns da

la destinaziun, a Tschiev illa Val Müstair ed in Samignun. Züst ha infuormà davart evenimaints impurtants. La TESSVM cun Scuol-Samignun-Val Müstair es l'organisaziun respunsabla tanter oter per la sporta turistica, per la reclama, pel svilup da novas sportas e per l'infuormaziun.

> PAGINA 7



Servetsch d'abunents e da distribuziun: tel. 0844 226 226 mail: abo@somedia.ch